

四庫全書

集部

欽定四庫全書

集部

侯菴集卷一  
三

詳校官監察御史臣曹錫寶

中書臣劉源溥覆勘

總校官知縣臣楊懋珩

校對官編修臣沈清藻

謄錄監生臣李世麟

欽定四庫全書

集部五

俟菴集

別集類四元

提要

臣等謹案俟菴集三十卷元李存撰存字明

遠更字仲公安仁人少博涉典籍喜為文章

後從上饒陳立太傅陸九淵之學遂盡焚所

著書其論學以省察本心為主其論文謂唐

虞所有之言三代可以不言三代所有之言

漢唐可以不言未有六經此理無隱前古聖賢  
直形容之而已惡能有所增損皆陸氏義也  
然存所學篤實非全谿流派墮于元渺併失  
陸氏本旨者比故其詩文皆平正醇雅不露  
圭角粹然有儒者之意是集為其子卓所編  
凡詩十一卷文十九卷前有永樂乙酉鄒濟  
序及危素所作墓誌末附虞集書一首樂道  
園學古錄有送李彥方闕憲詩序曰近日晚

學小子不肯細心讀書窮理妄引陸子靜之  
說以自欺自棄至欲移易章句直斥程朱之  
說為非此亦非有見于陸氏者也特以文其  
猖狂不學以欺人而已此在王制之必不容  
者也閩中自中立之歸已有道南之嘆仲素慮  
中至於元晦端緒明白皆在閩中不能不於彥  
方之行發之去一賊吏治一弊政不如此一  
事有以正人心云云其言褊躁與陸氏學派

若不戴天而與存書乃深相推挹豈非以其人重之歟亦足見元儒敦樸無門戶之成見也乾隆四十五年九月恭校上

總纂官臣紀昀臣陸錫熊臣孫士毅

總校官臣陸費墀

侯菴集序

鄱陽先生李仲公蚤歲聞道其學得聖人傳心之精微  
與祝蕃遠舒元易吳尊光三君子遊並生其時志同而  
行合人號江東四先生云先生之道吾不得而知也渾  
渾乎千古之在吾前也浩浩乎萬古之存吾後也而先  
生以一心貫之吳文正所謂陸子之學如青天白日皦  
然不可昧者至先生而驗乎予嘗謁先生先生年幾七  
十耳目聰明神氣以完真有道者也見予方微纏訓誥

為解乾坤易簡予因是有省先生之道其大者既如此其於文辭鑿鑿乎苴粟布帛之可服啜乎生人溫醇若經輩視韓歐無意於工而不能不工尔時之作者言談性命而不知文字之體或循蹈規矩而忽忘義理之實兼是二者千百無一二焉獨先生之文精深而切近高古而渾全天球古圭不足象其溫且凜也奔泉流水不足為其峻且清也譬諸造化生物之蘊蓄有未易識其端倪者歟先生嘗誨人曰六經三代之文漢唐可以無



作漢唐之文後世可以無言嗚呼知言哉先生歿嗣子  
卓網羅放失得先生之文凡若干篇為若干卷將畀諸  
梓以幸後世俾予為文序其槩先生子師也卓予畏友  
也予何敢以固陋辭抑學者非少知先生之道則亦不  
能讀先生之文也先生之文道溢而言從之也洪武癸  
丑諸生宜黃涂幾謹序

侯菴李先生行足以範俗學足以明理懷道不試士論  
惜之夫士之遇不遇有命焉於先生何損耶漢之黃舂

當時目為顏子故雖士庶而名登史冊叔度特生質純  
美耳人稱其淵乎似道似道且為人所稱矧先生真知  
實踐者哉宜史氏以江東大儒紀載之也又幸其曾孫  
光好學有文能世其家汲汲焉發先世之潛德幽光求  
言於聞人以傳不朽今觀弓內危內翰所著墓銘而先  
生之言論風旨猶可槩見即夫尚德之勤識其遺風之  
自矣嗚呼古之君子有種德百年之前而待報於數世  
之後者先生風流未遠遺慶之在其孫曾固不待著蔡

可卜也今光以進士起家為邵武長仕途方開日躋華  
顯人將曰李先生所未遇者在其後人矣嗚呼人之望  
於光者亦重焉尚勗之哉永樂三年歲在乙酉菊月東  
魯子鄒濟題



侯菴集墓志銘

至正十四年七月番易李先生仲公甫卒於撫之臨川  
縣大山寓舍明年冬素使至京口始聞喪哭于清忠亭  
又明年春玄教于宗師有興為位以祭授事狀曰子宜  
銘顧方縻於事役未遑論著後十年其孤卓謀奉喪還  
葬致廣信夏章之狀來請銘嗚呼素尚忍銘先生之墓  
也耶先生諱存字明遠仲公其所更字也李氏其先汴  
人八世祖居饒之安仁縣六世祖三居士積善無競曾

大父昌言宋贈朝奉郎大父櫛鄉貢進士父萬頃曰進士制置司叅議官之極從大夫也先生生至元十八年四月一生四歲而母吳歿幼穎敏莊重如成人弱冠遍求竒書及陰陽名法神仙浮圖百家言為古文章事親稱孝父多疾因通醫術有疾者雖甚寔必奔走視之未始圖報兄申伯死撫其孤嫁娶之逾己子其後三以所析產來鬻三還其券并讓其屋室器物鄔氏妹早寡資其衣食幾三十年育其孤至成長故早有州里之譽里

中友舒氏行宅日謂曰疇昔慕子之多才藝今游于陳  
先生立大獲聞聖賢之學子之所能學末也何為哉未  
之遽信久則又謂相者謂子不年苟無聞以死良可閔  
惜乃大感悔遂借造陳氏陳氏曰無多言心虛而口實  
耳未有所契復造焉曰無多言心恒虛而口恒實耳夙  
夜省察始信力行之難於是惟日孜孜究明本心焚自  
所著書內外十一篇曰無使誤天下後世同門執友四  
五人相與切礪期以大明正學時人多訾笑之毅然不

為之動科舉制下一試不偶即為隱居計來學者眾邑  
令禮為經師訪以民事郡守堂試諸生聘為主文三以  
高蹈邱園薦王文獻公為南臺中丞烏古孫右丞為監  
察御史交章論薦秘書著作郎李君孝光舉以自代相  
國京兆公將上聞處于翰苑會去國不果葺書室曰竹  
莊題曰俟菴恒語學者曰聖賢之言垂訓以先覺覺後  
覺此豈口耳句讀之事正學不明人心日入於偷甚可  
悲也徵陳子某其終為小人之歸或請學文先生曰唐



虞所有之言三代可以不言三代所有之言漢唐可以  
不言未有六經此理無隱前古聖賢直形容之而已惡  
能有所增損昧於理道而聲光是炫尚得謂之文哉虞  
文靖公歸老臨川著文集序和竹莊之詠致羨山林之  
日多道德之造厚先生顏古神清衣冠整肅不妄言笑  
憂世之意見諸眉映謙恭而和易與物無競雖武夫悼  
卒樵童牧豎皆望而起敬云俄兵興門人何琛迎養于  
臨川居二年而卒年七十四葬滎祿鄉竹莊娶趙氏宋

宗室金紫光祿大夫與禮之孫子男三人卓章多多今  
存者卓女二人壻曰某孫男一人樞曾孫一人復觀素  
少以文一編見先生雲錦山書其後曰子言言如古人  
苟求之前乎開闢而未嘗古也後乎開闢而未嘗今也  
嘗問思曰庸心官則思何思也先生曰思其本無俟於  
思者爾素不敏始稍窺所得而歸事焉及遠遊數貽書  
教戒不敢忘也銘曰世道交喪正學晦冥屹屹江東師  
友勃興於惟先生高蹈林壑才可濟時甘於寂寞言論

風旨淵粹高明昭昭終古雖死猶生歸葬故丘蒙銘于  
穴式尊所聞敢告來哲

欽定四庫全書

卷之五

欽定四庫全書

侯菴集卷一

元 李存 撰

古詩

西山歌

西山有廬以我逶迤中田有稌以我療饑春之日宜桑  
為父母裳冬之日宜酒為父母壽

古意

時官軍西征二年  
未利有感而作

秋風一鴈過彎弓登西樓臂弱弓不滿天高鴈難求吁

嗟流沙外風雨何時休  
三夜頻夢君馬知沉與浮  
况聞霍嫖姚已拜萬戶侯

玉龜杖

吳宗師寄歸以  
奉其尊人國公

瀛洲有真人雅度含天熙  
西鑄崑崙英東剪若木枝  
合為玉龜杖照我光陸離  
奉之堂上翁出入良自隨  
乃翁餘筋力寄此萬里思  
林塘春風柔老步嶮若夷  
不見手中杖但見膝下兒

次張伯遠立秋日飲水

秋風何離離客意方洒洒張郎飲秋水百病不敢舍詩  
成非有作清氣浩如瀉東吳百萬家疫死相枕藉不知  
曾飲此亦有少蘇者

于仲元之京師

蕭蕭霜氣白眇眇山葉赤居人且騷屑之子乃行役蒼  
茫倚天劍浩蕩躡雲鳥若師羣仙伯漢室久前席雖無  
世緣事亦欲侍朝夕涼風步虛廡微月坐白石古人有  
恒言出處各努力

楓葉雨中老簡上官伯潤舒元易

楓葉雨中老踈陰  
落庭戶懷親思  
方續觸景心已悟  
初光聊可玩  
頽照易云暮微餌  
何足充忘機不待吐  
方將鞭後懦庶以張  
前驚不有同襟者  
忡忡為誰布

贈李唐經二首

平生尚友心  
每欲盡今古  
子來適我願  
一笑與之語  
林深夜闌坐  
片月落襟屨  
雖無滿壺酒  
足洗千劫慮  
明年訪盧阜  
子肯從我去



西風雖無情落葉不自惜山深每高興况有遠來客起  
行西窗外覓句了不得共看天上雲纖纖薄而白

雜詩四首

少年不自惜老去百悔生還遇少年人告之不吾磨履  
歷始自見無乃歲月傾為爾惜歲月居然得嫌憎

老去無所為結廬在竹莊竹莊荆棘深宿昔狐兔藏豈  
無江海願齒髮不足償生則居菴中死則埋菴傍

秋日方杲杲獨行溪水干紛然浣紗女及此清未寒相

語有相厲歲晏霜雪繁誰云陶唐風遠矣不可還  
慕古既多沮從俗寧可安吾冠方委塵政爾不必彈羣  
醉敢獨醒孤芳若為園秋風况無情最解吹年顏

次危太朴韻

踈雨不作涼江雲尚叢叢客從臨川來氣若橫太阿示  
我古詩文篇篇秋露荷我年雖未衰憂患虧天和瑣瑣  
世非少涼涼誰實多胡為遠相求愧汗成滂沱心從古  
今赤髮則日夜皤進修信在已渝訛甘從他豈無八表

羽亦有千歲柯  
虞廷贊都俞  
商廟賡猗那  
遂此亦常分  
因君聊復歌

題游氏半村

入市既湫隘  
山居復蕭條  
湫隘塵滿襟  
蕭條絕無聊  
我生邑南隅  
頗病達與挑  
及遷荒郊外  
鹿豕相儻儻  
朝尋野菜煮  
夕掃落葉燒  
高興無所發  
佳賓焉敢邀  
何如游徵君  
隨緣自娛調  
家傳岐黃術  
取用給不饒  
獨於萬瓦中  
茅屋秋脩脩  
擊柝有夕警  
催租無晝囂  
仙情或少岸

禮韋常在膏習非原野鄙氣絕市井澆再饌皆買菜欲  
炊待來樵出門百步多流水石作橋老圃方競事牧童  
或羣謠吟節瘦可支酒旆青相招浮生在世間何異水  
上藻過求固云昧苦節亦未超况聞大隱人多混市與  
朝亦欲置編簡隨君少逍遙

題吳氏寓樂樓

天地一大寓人生果何云試觀混沌初豈待盤古分蕩  
蕩水上萍淡淡空中雲根蒂不可著氤氳偶成文既無

惴惴憂似有栩栩欣嗟彼世之徒衆萬相挺薰循環六  
欲根如赴溺與焚或為視耽耽或為吠狺狺不思過隙  
駒甘作負山蚊頗傳延陵家有在汝水濱往往構重屋  
瀟瀟出遊氛主人超然燕客子至者麋相娛輒琴瑟相  
論皆典墳竹月照清嘯蘭風拂微醺更烹山上茶亦煮  
池邊芹至樂本無樂寓言非所聞

次張仲舉阻雨見寄韻

淫流冒郊郭昏墊如堯年坐令意中人十日墜周旋問

信免為俗見懷斯有篇若人妙詩才華星麗秋天沈鮑  
不足避曹劉真欲肩時來林下居密竹涵清娟戶牖鮮  
云異言談多所然世情有隆替古道無陳鮮願為盤中  
漆莫作弓上弦盤朽漆不落弦枯弓自捐

題燕超樓

邑屋次魚鱗市聲喧蜂衙百年九秋葉萬事三春花所  
以古仙人樓居樂無涯地有不必避心休真我家銅爐  
沈水香石鼎先春茶足可致風露何勞痼烟霞我來秋

未深涼風生蕙葭如垂桐江絲遠在滄海槎俗情比如  
櫛老去空咨嗟安得分半席從君讀南華

題王氏笑閒亭

笑者不必閒閒者不必笑能笑又身閒涉世何爾妙利  
名浩於海好惡險成微躋攀有亡命憤鬱或大叫癡如  
蟻旋磨饜若魚上釣不知歲月往以死復誰謂之子素  
相聞磊落年尚少構亭頗軒豁勝槩得其要幽花淡無  
媚新葉光相照倚欄皆可樂百事弗前料嗟我玩陳篇

兀兀老蓬藿雙眉久不展有臂莫能掉山根晚雲薄誓  
欲隨荷篠倘子不疵瑕拂衣共登眺

寄題汪氏退密菴

紫陽汪大夫未老先致事經營百年藏結菴自休憩扁  
之曰退密有取於易繫相望千里餘一笑問以偈云何  
謂之退密也果何地若言早休官眼底非一二身雖似  
門暇心或未能止若言四大離蓋棺事則已紛紛長夜  
者皆悟退密旨非但如上云十目之所視夫人皆可能



何取密之義大夫天下士未必只如此菴傍皆高山菴  
外即清泚晝饑隨粥飯夜則伸脚睡平生易甘苦一一  
皆夢爾不睹不聞間從來白於水試問菴中人如是不  
如是

和汪府判生前挽詩

世人但謀生鮮克獨營死平時不了念骨朽或未已汪  
侯方七十綠髮照白齒家山自營域不以貽孫子松梧  
舊培植瓦石新甃砌豫事固有譏達生亦可喜竊聞高

世徒不囿生死裏長存非有戀奄化亦無恚豈復較委  
收尚何擇鳶蟻天地我棺槨山川我衣被况聞階庭下  
冉冉富蘭蕙崇廣存古法絞衾以時制先生固云達於  
此似多慮

考試呈同院諸公

湖水澹暮色松林鬱秋烟沉沉絃誦堂濟濟衿佩員太  
守親試藝整襟坐寒檀教言既疊疊秉志真拳拳外郡  
且能來豈徒我疆屢競題慮寸晷運思窮深淵喧如晝

蜂出寂若春蠶眠少輩固卓犖老翁亦踰躐嗟予果何  
人讎校追羣賢白晝靜兀兀青燈夜如年聖朝久薰陶  
良牧初承宣擇善敢率爾逢奇共歡然顧此且凡庸雖  
嘗習韋編粗通象數末豈達天地先况復事箋註真成  
守蹄筌去取豈其任強顧效埃涓五番亦幸哉士氣新  
且堅中程固云喜暫黜亦足憐志欲等金石朝昏自磨  
鑄重逢大比時定有高科聯聞當由輩出功名或無前  
豈惟一時美足使千載傳

贈胡巡檢民

志父光卿皆當年叛寇奸臣指近年已延而言也

重雲間濕熱欲作夏至雨胡子溪上來披衣一相語南  
風解人意稍亦入窗戶開尊薦瓜韭汲井具雞黍子為  
廬陵秀家世蕃且鉅早歲走京師騫然好儀矩詩書雖  
素習殺氣在眉宇暫為巡警吏出入備鉦鼓手弓張黑  
角膏箭開白羽里曠散雞豚垣墻奔狗鼠因思閩廣間  
壤地有深阻况豪據溪洞老幼負戈弩幾微相啖噬動  
輒生齟齬古今聲教遠往往累南土整齊非束縛全活

在綏撫荒忽固無常跳踉乃其所雖云聚蜂蟻頗亦頻  
軍旅遠道困供輸窮陬多毒蠱幸逢天子聖元帥復雄  
武前歲醢光卿今年烹志父此雖下愚者生育皆父母  
端由一念失血肉浣砧斧天道實寬容皇威安敢侮今  
聞豺狼窟悉已反農圃早暮或莖芋村墟且商賈奸臣  
操國柄近亦死南浦詔書一日下海內盡歌舞橫算罷  
舟車求賢復科舉閭閻皆跨馬流謫歸故處百祥斯可  
至萬惡為之沮顧余頭已白甚覺負章甫眼目更昏眊

筋骸將偃僂子年纔十五聲價滿吳楚朋友實大倫磊  
落傾肺腑行當分閭櫝終可立朝宁相看方侃侃索別  
何踽踽波濤隨地有切莫倦篙櫓雙雙鶴鶴下一一漁  
樵去淒迷斜照草髣髴晚烟樹出處莫為謀音書可相  
許

汪巡檢南雄官滿過安仁且將北上賦詩為別  
積雨夏方歇山居清不炎若人故意多遠來信搗謙疇  
昔相見時瓊枝照秋蟾別今二十載頗帶嶺海黔同來

二三公氣度和且廉山市急沽酒既罌倒藿鹽邵子間  
善謔馮君拚長髯此歡豈易逢累日殊未厭竊聞黎徯  
民煽據雷與廉牧守或散走偷生向閭閻每病法家流  
但事筆與槩虛文失情實舉劾皆細纖公卿習為常動  
輒生疑嫌落落視大義營營盡私歛致令犬豕徒跳踉  
在嵯巖空調外郡兵入境先痛疔朝廷重臣職擇彼興  
論僉誅賞一出已毋拘文法嚴彼雖要荒間聲教之所  
漸豈無忠勇者拊膺坐蓬蒿購募不可緩恩威貴能兼

拊循各有素強弱無庸覘土性耐蒸溽方餐慣煨燻既  
耕亦且戰勿責歲月淹充國罕羌服狄青儂獠織子方  
尋徼歸我則安窮簷因言忽及此有淚忍不沾更為盡  
一觴檻陰畫織織明朝復千里相望青雲尖

流民歌

邳徐二州皆凶灾流民如雲過江來布衣絲絲泥水破  
黑妻騎驢兒在懷為余言之心膽摧剥掘榆皮蘆白茷  
只今貫鈔一升米不去坐死何為哉



齊老堂

宋理宗御書賜史彌遠今歸吳氏具慶堂

齊老齊老人齊老多少世人齊不老史家父母昔齊老  
吳家父母今齊老當時落筆山嶽光二百餘年歸此堂  
秋塵如烟隔精采白髮眼明猶再拜

昔年

昔年有語雙白頭棄我忽作齊梁遊雲鴻不飛音信斷  
寶鏡塵昏秋鬢亂君心一去如飄風妾心死與黃河東  
清霜昨夜入庭樹欲寄寒衣不知處

題李早三馬扇面圖

奚官熟閒秋馬健秋草青青河練練誰知萬里欲風塵  
寫入時人手中扇只今但賞畫者誰錦標玉軸皆名題  
空令林下老韋布似聽塞長烟雨嘶

贈御史孫幹卿

前年鄉友高知事口口談今孫御史泉南漳浦號祥刑  
結獄大囚心盡死牙籤滿架雙眼明貨財如山秋葉輕  
為人更有最難者聞一善語江河傾陝西行臺霜雪裏

控制羌渾千萬里澄清乃是夙生心豈待西風方擘纜  
三間老屋孤兔丘浩浩今古無窮憂豈冠及見此賢俊  
未歎深山空白頭

題潭州李侯祠

長沙李侯烈丈夫孤城未陷期須臾殺身報國世固有  
闔門不生今古無一時義氣塞天地宗祀縱長非所圖  
勇哉二客亦從死已事劍夫還自屠至今言者心膽破  
想見生血紅模糊故家雖作孔子宅廡下爐香人共惜

專祠肖像一朝新凜凜配從皆其人烝嘗自此千萬世  
賊子亂臣生亦死

美葛子熙

臨川葛生樸且文負擔有力能辛勤家貧妻死母又老  
短窗挾策長云云忽思句讀送日月曷若江湖勞筋骨  
高碑大碣處處有篆楷草行兼八分畫長院靜手自打  
襟帶染煤常若熏旁搜遠取到川陝况乃閩浙江之濱  
通都大邑逢好事羅列古雅踰璣纁相酬金帛不論直

豈比市井爭釣斤收藏圖書家若府下者秦漢高華勛  
春初過我因細論絕勝待食如牢豮四方達士一時見  
野店濁醪常半醺顧余髮齒久希豁脫簡尚閱徒逢芸  
何當一竹兩芒屨共逐溪山秋半雲

贈王孟剛

東平少年王孟剛譬彼玉美金之良靜明先生振古學  
及此一見中心降似非疇昔有靈骨孰不睥睨而傍徨  
肯捐俗下奔競態樂就席末樞趣行英髦文會我所願

事業川至君方將非為真實有興起亦且編簡盈筐箱  
輝輝過眼翠羽濕落落照坐神珠光師生於義未應捨  
父母入念何其長朝咨夕究非高義天上地下唯綱常  
頻年相近歡不厭一日欲遠情為傷朔風吹柳可得折  
臘蟻在酒無從觴已知遄發問歸棹未卜重對清談床  
人言肝膽分楚越理則古今無樊牆魚行千里春浪白  
鴈落一矢秋雲涼寸懷彼此不須惡但遣初志長毋忘

鄧子高玄明粉歌

天冠山中鄧子高瓊臺絳宮神所邀歸來制鍊玄明粉  
石鼎夜夜生光毫清水白雪相烹熬廣寒之杵玉兔操  
千搗萬搗成雲膏六丁六甲呵護牢電母照耀雷公號  
神君奮髯開寶刀病人圭乙到口腹三尸二豎皆奔逃  
破裂瘕結宣腥臊飲食自美元非饕聽耳明目扶傷勞  
久久服之何二毛山中修竹圍庭阜風枝露葉秋颼颼  
故床日炊綿布袍奈此癘痼方哀替茗江彭蠡春未濤  
胡盧自負行輕舸顯晦莫測真仙豪苟有及物隨所遭

株守無用唯吾曹

寄薛玄卿

扁舟維在藍溪渡  
蒿子窮忙非敢侮  
移牀沙岸近青竹  
歌枕篷窗數紅樹  
昨宵曹子始來說  
三度出門三度雨  
留行會別總皆天  
嗟我與君安敢怒

侯菴集卷一



欽定四庫全書

侯菴集卷二

元 李存 撰

古詩

次韻戚總管賦雪

長風剪水不成片城上將軍鐵為面五更吹角墮梅花  
天女騎龍淚如霰坐令萬瓦白參差人在蓬萊水晶殿  
黃河夜合龜鼉深太行曉裂豺狼戰尚憐廬阜足佳致  
五百寒僧不開院崑崙崙朔南日本東未信天花一時遍

塞邊勒馬公所閑橋上騎驢吾不倦  
化工作巧本容易  
臘盡春臨已三見  
明知無酒俱冷落  
豈有多情更歡宴  
長安市上一貧士  
白晝閉門何所羨

題萬氏姜逸山別墅

李存老矣營竹莊  
萬君別墅亦在姜逸山之傍  
何當縮地一百里  
長鬚赤脚買魚沽酒朝夕相翺翔

題遠山書院方竹

遠山書堂數竿竹  
立雨搖風如綠玉  
仙公好事畫作圖

詩客多情賦成軸竹邊有人過吾廬誦詩展書清有餘  
聞知竹老須滿節內圓外方我不如

畫鱗

詩人素饒饜見畫根醋香風蒲青颯颯江沙秋未霜

次王允中韻

堂堂休明運佳氣滿河嶽士無終身悔道有一宿覺之  
子文獻家嶄然見頭角况當盛壯年顏貌若丹渥遨遊  
石溪上何異鴻得桷窮冬忽相過接語知嗜學煌煌七

星劍疊疊九成樂我若大海舟茫茫竟焉泊鰈鰈相伴  
侶風水振鈴鐸又如山下石粗泐復誰琢幸有知己人  
梅邊手頻握

美徐典史再任

安仁雖小邑政爾費懷撫去年救饑荒前歲接軍旅填  
溝隨死鴨索肉過饕虎長官亦奔走案牘更勞苦朝飡  
或曛黑就枕聞五鼓聚米猶聚金視身如視土三年當  
考績遺愛在農圃忽聞可借寇是則天所與羨君詩禮

裔涉世通不腐况有五男兒翹翹盡婁楚顧余何為者  
挾策老環堵君來即知己杯酒相爾汝豈不幸長留時  
時共雞黍義當公天下私欲安敢取

王承事均金謠

公來涖茲邑數月始求見時逢芒種雨喜氣滿顏面恤  
民有真意為政自無倦貢金均衆力旱禱先已謹道路  
既歌謠困倉亦餘羨况聞用休暇稍復接羣彥永晝拂  
清琴良宵玩黃卷武城得言偃單父逢子賤願公堅此

操循吏久當傳

寄題劉氏集義齋

義者果何物而乃俟於集喻如久行客名利兩羈繫  
攷較青紫瑣瑣稽百十朝昏膠入漆夢寐水流濕忽聞  
知己言胡不返鄉邑青年既流蕩倏爾白頭泣一時生  
感慨俄頃具車笠渺渺絕江河迢迢歷原隰或僵泥濘  
滑或震波浪急雖則多苦艱歸休志先立入門集尊幼  
藹藹舊和翕雞豚與黍稷取用無不給是為吾固有鄉

者徒汲汲義經尚頻復孔訓記時習所以名世賢多言  
屢於邑高齋用斯扁古意真莫及倘或信吾詩不須勤  
負笈

寄贈臨川李兼善

南豐羅子知名久來館宗家相與友秋風一日到東籬  
收拾行囊歸葬母偶逢臨汝李兼善家世素儒心甚厚  
平生遊藝及山水兩卷青囊常在手為尋佳處得瑤湖  
草潤松深纔一畝價錢僅費五十貫主不食言人莫嗾

羅家大事談笑了嘖嘖無瑕齊衆口李君為義不為利  
反壤之餘長揖走豈知天意相君子吉兆能人凡事偶  
吾翁平日尚此事喜買廬山彈所有往來觀者數百輩  
甲或可之乙稱否朝歸暮往芒屨破野店蕭蕭幾樽酒  
苟非宿昔未逢賢定是蒼蒼不輕授吾聞地理猶人身  
有穴宛然針與灸後來福德未相稱青不見苗唯見莠  
我今汨汨心未已人事天時宜兩究何當兼善忽相過  
混沌一朝為我剖



寄題徐氏屏山堂

吾聞洪都徐永平作堂居傍山若屏東西插架更書史  
與我靜對皆儀刑功名如幻何足計但見舊物擅青青  
堂中賓客日雜還窗外松桂寒伶俜古今華構嗟豈少  
圮毀不待斤斨傳永平今去六十載兒子白頭猶抱經  
湖邊之山秋最早案上短檠深夜熒平生知己有過者  
脫巾掛竹相忘形諸孫滿眼又勤讀玉未出璞先玲玲  
顧余向衰百無慕明年杖藜當扣扃西山雲霧與一啜

窗下不眠能細聽

登金盤山詩 并序

至正七年五月二日余登金盤山積雨初歇草木欣  
然一逕縈紆約五六里始及僧顯所營也四山環聳  
中得寬廣辛勤數年僅成一堂良不易也顯方出遊  
別村興盡而返因賦一詩以遺之

籃輿曉上金盤山山僧乞食方未還徒從負鑊皆出作  
一犬卧吠清泉灣地無沮洳宜粟麥土有墻植稀榛管

瓠藤葛蔓籬漠漠薑芽芋葉溝斑斑向來人跡罕所及  
唯許樵牧時躋攀漢時王者曾塋此惡蜂毒虺多神姦  
相傳田野不足信苟非佛域真仙關道人宿有山水分  
擇地即得天非慳拮据之手輟趺足寸土尺木難而難  
把茅蓋頭亦足矣何用美構追工般奈緣好事世多有  
重在一念輕千鏹人間百歲彈指頃寧幾少壯尋衰屨  
文章富貴皆外物至樂無過心長閒我來巧值師有出  
煮茗自汲春潺潺尚須早晚秋雨過亦就白雲分半閒

題陳同年秋有堂

采采黃金花蕭蕭青玉枝不隨別時好每與風露期所  
以彭澤公休官在東籬相對每無酒徒有好文辭同年  
陳徵君種之亦盈畦客來便開樽爛醉不復疑去春始  
相識烏髭滿丹頤豈非制顏齡古語果不欺頗訝邑里  
同扣門定何時落英幸見食庶以療吾衰

挽楊閣中

高岩應記曾遊者赤日黃塵正長夏此翁倒屣出相迎

羽扇綸巾絕瀟灑  
僮奴俄頃具樽俎  
談笑無窮到書畫  
十年別去勞夢寐  
一日傳來成羽化  
達懷委運更何求  
老淚多情自如瀉  
長遊滄海總真趣  
回視人寰徒土苴  
莫言埋劍在龍塘  
早晚紅光看斗下

倪友文氣清而性和  
聊以數語為別  
不足舒吾意也

若人少嗜青囊篇  
乃肯過我非其賢  
山行不避六月暑  
因與赤脚踏清泉  
祝君聰明天下士  
文學許之無間然

白瓜青豆且共飲尚可倒囊尋酒錢

題虎溪三笑圖

行止隨時何必限一虎溪偶過虎溪何笑之為

題塗季方廣胖堂

世間無物拘礙我童冠暮春風舞雩不隨二氏樂荒怪  
亦有細人疑腐迂堂中之人雖未識取義名堂吾獨恣  
何年解屨登斯堂清坐共君春晝長

題倪學卿謙謙齋

學卿之學謙且謙用以扁室何其嚴天高地下人鬼著  
反此則害無庸占權門擁篲情如閹倒執手版神為穢  
君看花流水流處譬彼食蜜中邊甜

和汪子長韻

閉門久與童烏立藪藪老竹秋風先日用浩浩皆吾天  
去古遠矣誰當傳身雖塵土心則仙玉株碧樹分後前  
龍溪居士通玄理亦視浮雲如脫屣當時經濟不盡材  
留與諸孫真上計日車難把長繩繫男子功名須早遂

濟川舟楫真爾曹安肯坐守東西臯禹鼎象物深且高  
魑魅魍魎何能逃期君他日行此志看取千丈生光毫

次高元博韻

老逢盜賊繁俛爾度昏旭蕭蕭數莖髮連月不暇沐晝  
常雨中飡夜或林下宿深惟崑岡上誰辨石與玉茹珍  
蓋糠粃飲水即醞醑相逢破肝膽豈但皺眉目大宜適  
他所采擷皆可藪竭來安且靜殆若立於獨南風滿窗  
簷衣袂清不醜梅實得調鼎松明勝燃燭顧此若蝸牛



穀中少涎足故人意不滿蓬華母乃辱置酒對榴花誓  
將徙華屋吾聞學仙者隨處武夷曲矧茲秋風近白酒  
家有熟雖無羨魚飯賴與鹽齏粥

贈陳九成遊國學

黃雲潭潭天欲雪陳子初來即言別值吾築室正狼籍  
為煮春茶供再啜子宗九江稱義門明年挾策遊成均  
奎章先生賦詩贈秋波一幅清無塵竊聞國初許祭酒  
正義堂堂古希有諸王駙馬皆敬憚帳下公卿列先後

即今規矩猶當時肥羊大餅午不饑願君努力積分數  
他日錦衣當晝歸

次韻吳宗師和元參議道宮墨竹詩

東西海水先秋寒上有鬱鬱三神山  
或在玉京住山中竹石那得隨  
渡黃河灣是誰好事寫於壁  
風枝雪葉依孱顏人知寓物不留物  
我并無寓間而間中書叅議亦高致  
倡以妙語題其間不須駕鶴仍鞭鸞  
坐閱物理如循環有時見此非詩非壁  
亦非畫但覺鼎內朗朗

金丹還

下第南歸別俞伯貞

驅車出都門別酒忽在手去國古所悲况復失良友  
芄丘中麥鬱鬱道傍柳揮手從此辭烟雲黯回首

寄史誠翁

誠翁女賢聯騎過吾竹上留之不可匆匆而去他日  
以詩寄小形不滿云

入夏多雨意頗清又說新水上高平不期而來吾所喜

苦留亦去君何情村醪方熟幸免沽熱雞雖瘦還當烹  
癯然不試今老矣日日相歡須友生

寄題臨川樂氏東白樓

喔喔林下雞炯炯窗間紙奈此旦氣何幽人攬衣起於  
時無所為默識天地理由之為率性反是則迷已求仁  
信尼父言善尊孟氏君家構重屋取扁豈茲意青青山  
外山渺渺澗之水石根有松檜沙際有蘋芷深簷霧或  
宿危角星尚綴省察屬吾儂無從但瞻視

金谿尹德政詩

金谿豈但千餘室得尹多賢從昔日其間趙李最為優  
鄰境至今誇未畢朝廷經理在延祐吾獨令民先自實  
稅糧飛虛戶逃詭無窮研磨皆以質豪姦不利終莫沮  
區畫公平嚴且密遂令高下出信籍貢役歡然非督扶  
邇來近越三十秋刀筆貪險閭閻偷簿書往往有緣絕  
經界欲慢將安尤社神有怒陰有相剛決而善來周侯  
丹鉛朝莫躬點勸人不敢懈誰其度漢時黃霸稱能治

某木可棺猪可祭孰云千里劇而繁殆若邦君私事耳  
每疑州縣今最難使家上府臨如山所尊所習乃文法  
豈有骨髓憂民間坐羶未穩欲交代催科送迎何時閒  
模稜斯可足歲月否則急急歸囊慳後人果盡不如古  
空遺林下多長歎俟今漸老方無倦經術文章能幾見  
已知增秩快輿情他日必先循吏傳

叉魚

霜風刮面冰如刀持叉入江矜厥豪投深中大始一出

眼溢膚凍如紅桃嗟爾得食亦稍稍性命或與蛟龍遭  
安得長叉一萬丈直向東海叉六鰲

和丘南傑

渺渺北山下沉沉楓樹林但見黃葉落不知秋意深西  
江有高人百里來相尋平生妙詩才足慰夙昔欽飽遊  
閩嶠中浩浩古與今氣可拔九地當為千尺岑甕盎同  
紛紛希聲求大音何時得重來窮此千古心

寄題陳氏東閣

大明生於東孰不快先覩陳公構高閣百尺凌清霧雞  
鳴四無人起坐寒窗曙雲霞已披靡海浪猶掀怒滄涼  
成寓辯寅賓付稽古流光洞纖隙初氣足吞吐紛紛方  
美睡鼻息撼環堵

贈主簿汪復心運糧至宣州回

汪侯瑚璉姿夙昔忠孝門屈身簿佐間公事多馳奔運  
餉出千里濤瀾江漢昏蛟鼉固云驕盜賊相并吞皇宮  
一何情聞者猶喪魂我侯秉家學勉勉心自溫靡盬有



前訓致身無後言惜哉朱鳳凰八表高飛翻正色乃齊  
楚歧行皆弟昆終知世所非或者天實存故山夜來雨  
青青滿東園脫有相過便一觴聊可援

次韻答沈文友

至運有消長大明無中偏沈郎真特才餘子非其邊已  
無俗中態更信古人編髻鬣蕩江海金珠破昏玄歲晏  
始相逢促席梅花前樓角轉山月歸人行暮烟開懷更  
一一過眼空千千嗟予離索人膠柱胡能絃冥頑苟云

理土石皆為僂秋葉難自惜寒花誰與妍明知指非指  
所貴天其天燕石不在櫝游鱗隨所筌紫陽賢弟昆好  
學無其先稍稍外形迹醉時吾即眠乃翁廊廟資文彩  
如雄遷愛子及其友勉旃皆盛年

送洪教授茂初

忠宣盛澤餘孫子分教如今在柳州此心初不異孔孟  
何俗莫可回商周玉堂金馬自茲始九疑三湘因得遊  
蠻客舟車過如織安書時遣到蠻洲

題太行飛雲圖

仙人家住錦水湄  
父母在堂懷綵衣  
太行飛雲日月見  
豈必千載方來歸

贈劉與畊

秋風吹子之衣巾  
庠序偶爾逢劉君  
文章似海方戰罷  
兩袂猶帶西山雲

偽鈔謠

代為者社作帳  
辭謝尹楊思齊

國朝鈔法古所無  
絕勝錢貫如青蚨  
試令童子置懷袖

千里萬里忘羈孤豈期俗下有奸弊往往造偽潛隈隅  
設科定律非不重奈此趨利甘捐軀縱然桎梏坐囹圄  
賸有囊橐并尊壺生平心膽死相遁口舌所掛多無辜  
人生既以不堪此惡卒乃藉生危圖苦之極楚甘酒肉  
役用在手猶枵珠或思夙昔報仇怨或出希覬傾膏腴  
搜求寧肯剩雞狗汙辱間有連妻孥何如巧遇賢令尹  
燭照劍斷神明符先窮支蔓到根本曠鐵雖硬歸紅爐  
非唯此境少憂畏亦遣鄰邑多懽愉自憐弱肉脫虎口

從此飲水皆醍醐誓將白首至死日頂戴豈與劬勞殊  
願推此舉遍天下咸使良善安田廬

題樟南閣

曩年冰雪何其酷到處豫樟皆折禿吳家一株三百載  
老葉至今青款款面之有閣開八窗詩書白晝南薰長  
土深根遠耐寒暑閣上主人如此樟

送倪季成一如說

倪君宿昔真才傑種杏滿林頭欲雪養心似到一如如

寄語從予求解說我今衰老舌本乾掘地為鑪蒲作團  
君能它夜肯相過共煮苦茶山月寒

侯菴集卷二

欽定四庫全書

侯菴集卷三

元 李存 撰

古詩

慶吳宗師降香南歸帳詞

我朝列聖仁如天齋宮穆穆賓神仙神仙無為法自然  
襲號不愧莊生篇皇帝有詔卿來前陰隲下土卿當先  
稽首受詔毋留連紫鸞飛空金作鞭寶旛新剪天花懸  
銀鴨冉冉分龍涎并聞海上三山聯瓊臺貝闕靈所便

酒醴瓜棗陳千筵寶章夜飛風肅然物不疵癘民無愆  
下土再拜師能賢

詩別汪伯羽且聞天樂溯行并呈似一笑

客入山中來繫舟在窰浦挿秧昨日了得此芒種雨片  
言即欲別豈不共雞黍賴有柯鍊師蓬窗足深語

橘亭詩贈黃生

巴園剖橘逢雙棋未剖已先人不知到今智士譏剖者  
勝負紛紛無了時黃家亭中亦多種幾見十月清霜垂



更須會到未剖已先意欲車欲馬欲砲欲象皆繞之

挽楊牧心

我家祖母公之姑聞昔過從不少踈夜月幾吟梅下石  
秋風嘗醉竹間壺陶潛未老即歸去虞卿非窮多著書  
嬉遊尚擬共諸父忽謾往矣令人吁

祝丹陽以古琴見惠且寄以詩次韻答之復以  
史略一本為謝

涼風蕭蕭吹井桐佳懷如寶千不逢二年蹤跡走闌闌

面目土炭心盲聾其髮豈異伏櫪馬雲漢獨羨高飛鴻  
詩琴遠致心甚厚金玉備具相玲瓏大珠沉淵炯不動  
朗月照水清欲空亦知廬阜入幽夢幻此三疊銀河風  
紛紛醉裏不知老有此二美誰吾同彈琴固可消世慮  
作詩乃或令人窮未如祝仙古巖下往往遇會方瞳翁  
聊將史略報深意并問馬首何時東

贈蔣立賢之廣德任

靜明先生真古儒誰其師之三祝舒嗟余小慧成大愚

欲信不信空居諸論詩作賦甘區區一語及學茫無途  
終然旁薄差不如過此盛氣隨樞趨義哉詩友不棄予  
輔以磋切何勤渠初如蜜炙香且腴久若劍刃深剝屠  
惕時玩日雖故吾渴則必飲饑當舖象山之學非高虛  
六經在人一字無平生感此誠難孤仲祝已死良可吁  
知君識見與俗殊想今致力誰能踰搜剔窟穴窮根株  
我雖未識心先輸此行贊教風雲初首蒼俯食甘於魚  
棘闡擢士稱錙銖季祝已中登公車闕朝二友為時需

嗟我不喜當何如嗟我不喜當何如

李仲祥教諭棄官侍親歸寧國

先生家住雙溪邊來此學計方蕭然東裨西補長如煎  
藥不可口水寒堅宿昔敬慎無遺捐毫末泛濫心拳拳  
荒中飾外俗則圓恐懼修省漸遺編九州庠序如星聯  
安得公輩多百千斗升翕忽空中烟奈此靈府良難全  
高堂頤鬢霜娟娟干祿及養夫何愆忽思溫清誰當先  
十宿九夢針生氈一朝遂賦歸來篇詩書在囊月照絃

秋瓜之饒方綿綿仕止有義吾何權先生去袂誰能塞  
別意不盡隨流川入門想見又歡妍彩衣跪舞風踰躑  
桂花蘭葉香滿筵酌以大斗行金船君親二事初匪偏  
孝則此日忠他年

次友人晴韻

忽有竒趣生朝晴即而失之行復行川流無梁不可度  
梅花立烟何爾清東丘老石亦佳色南陽鼙鼓非和聲  
安得無孔一枝笛與我崑崙絕頂橫

薄暮畧歸

山花淡無慮山靄清欲流行行豈不遠足倦安敢休正  
為落日恐忽見月在頭躊躇成獨笑且復得悠悠

臨川南洲何成道有詩送簞與陳又新真人真  
人屬和且以見寄因次其韻并簡成道二首

仙人豈必芙蓉城世味淺鮮神自清或隨天際星斗出  
不改山根霜露明南洲有人榻應下北海之座尊且盈  
紫芝謾采亦成曲未許遂與商山名

來詩足貴如連城舉觴再詠新且清閉門苦覓信無已  
指鼎即賦聞彌明楊花從汝歲冉冉瑤草在我春盈盈  
向來陶陸為苟好未必千載餘其名

寄舒元易二首

昔聞舒子言今已向三載可憐下愚者孳蔽不自解百  
年真倏忽况此弱而痿嗟余古之徒菲體辱相採絕如  
溝中蛭豈識江與海江海未足云天覆而地載明年已  
多幸稍已開柵械青青溪上山逝欲從子邁儻或與所

聞雖死亦何悔

理有必然至事有不可測堂中親白頭房內妻廢辟孤  
姪每來前顏色何慘戚既無甘旨奉更乏育子力幸然  
秋稍收裨補隨所得雖知非外事寧免相感激客床半  
夜覺展轉而反側忽喜雞一鳴寒窗爾難白

汪主簿清明不出見寄次韻

人情雨中花客意松上烟苟非薛下門何以歸龍泉附  
驪知自遠慕羊徒得羶君看長舌人早晚乾無涎所以



汲太守穩作淮陽眠昨日出東郭風榆吹綠錢流光一  
何情去去我郵傳道逢誰家子饋奠號新阡感此不能  
已戎笳吹晚天

次韻戴同父留別

明主建皇極元臣運洪猷歎安海無波羽鱗斯泳游誰  
云吾道東聲教喧中州漸摩三十載荒徼靡不修祥凰  
端自來天馬豈待求漢業避光大周基共綢繆時逢戴  
廣文烟出冰壺秋信非岩穴姿致此蓋有由西風芙蓉

花去駕不可留情隨別觴盡思與江烟悠有句不相寄  
遐心定誰尤

贈周易初

山木日已陰東風澹荆扉子從遠方來未久遽言歸壺  
傾不忍別乃復把其衣卓落豈自放孱頑甘所撓致君  
術則同枉已禮或希聞風固有訝信道未必譏高帆拂  
踈烟江水日夜肥願子慎流止前途多險巖

山中留宿明日以風雨對床眠為韻賦詩

雅性厭喧隘結廬林野中林中果何有勢利罕相從異  
哉四子心春江遡孤篷洒洒竹方雨泠泠松欲風貧家  
百無為蔬食隨所供但於文義間稍願相磨礪顧此有  
餘樂言旋胡爾匆人生難定期往往如萍蓬豈不易分  
別談諧誰與同尚懷秋花前興滿山園東豆寒始能莢  
韭潤亦已叢倘或不遐棄清遊應可重

壽吳閑閑

三山駕滄溟鍾秀生神仙信為物外姿俯結區中緣早

隨玉堂客經揖金爐烟詩書乃餘事行義真無前瑤壇  
奏通章報國殫成悃玄和格窮壤彙類豐且鮮冠裳七  
寶粧十載褒恩連高堂有具慶燕越心所纏膳羞以時  
至暑葛冬而檀丹砂雜遠藥備養無纖愆乃公性嗜酒  
巨量如長川每逢親故來一一乾瓊船夫人善將理筋  
力彌清堅朝昏總衆務內外靡不宣我皇降厚澤暫許  
雲鳧還奉觴再拜餘顏色雙明娟吾聞至德士往往昭  
其天四海誦光美鬼神無間然貴富時則致此歡那得

全嗟余不殄人怙恃今成偏謬為童子師卒歲如拘攣  
精神寄宵蝶勇委慚春鷓吁嗟甚蒙愜在已誰當權往  
者雖弗及來者猶可焉山田秋日高小徑相扶牽或分  
棗如指或割瓜如拳或沽鄰家酒或釣東塘鮮雖忘榮  
華事願以適自虔名山豈不近百里寒泥濺既無謝公  
屐又乏王良鞭靈菊正香晚江梅芳共妍相見酒如澗  
賓客填華筵缺然安所傲引領歌青篇向來唯幄中不  
隔崆峒巔達者自天祐追歡當有年

題開山寺上人翠深閣

吾聞開山寺繞屋萬竿竹  
沉沉窗几淨冉冉襟袂綠  
道人燕高閣曠劫心自復  
端如九秋水浸此藍田玉  
嗟我本凡庸塵埃滿茅屋  
清遊豈無興何事久羈束

遊古象山一首贈別陳又新入京

昔聞陸夫子講學茲山巔  
山以形得名名以賢而傳  
近從師友後結此登山緣  
溪流涉光炯逕草披蕃鮮  
松柏作旌旆蜩蟬為管絃  
盛年筋力強老大須扶牽  
祠基久

方及沓石遇最先梁棟藉荒草炷香神颯然幽竒樵或  
知物產僧所權漚竹可成楮燒茅斯糞田復循馬脊岡  
四岫分躋躔瑩公址亦存池井皆充填閩水尚青玉吳  
疇空紫烟上山日始升下山燈火睽觸景有深省敬游  
心共專真人益高懷馭鶴來天邊昔時釣游所一一無  
遺捐或尋靈運屐或待淵明船仙甕足春酒清歌方扣  
舷芙蓉涼欲花又著歸朝鞭尚疑鑑湖公一曲遂自便  
行藏吾有時外物何能遷出山山不嗔居山山不妍長

嘯了山意青青時在前

贈臨川葉以清入京并呈其兄邦用

江城六月暑來此幽人廬沉沉千竹林炯炯雙玉株伯  
氏清不槁季子通有餘為言秋風起逝將遊帝都秋風  
萬里長吹子舟與車堯舜相揖讓臯夔協謀謨孰云百  
代下而不回古初人生於此時誰能守丘隅况子富且  
美行哉莫躊躇

次韻十叔種菜



陰陽無停運菜甲互消長但令人力及生意孰非壤七  
年東山下剪棘開一掌椎牛付危味烹藿足真賞形癯  
志無攝胃澹心則廣身雖萬夫後興乃千古上縱情宜  
有止行樂貴非蕩堂堂十家叔雅度入玄爽林園托高  
蹈葵菽擅清享謀生或云拙至理焉可罔悠哉有超悟  
允矣無骯髒

次黃晉昭韻

堂堂曹州伯學道窮諸艱二年竊書鄰指我觀其瀾華

自序  
卷三  
章一為別字字皆悲端我如再歲駒始受覆與鞍已愁  
太行險况涉流沙漫君如中天月一照山河寬餘光落  
尺素許我平生看

和彭起南韻

黃葉風吹盡林間見枯株若人獨何為乘此下澤車他  
物非所求辛勤在詩書既傾北海座復謁南陽盧信有  
衆善歸河流深九渠顧茲戕賊餘蔓草日自鋤從渠譏  
議者謂我腐且迂孟氏取不愧義經明有渝他時忽自

強老矣將焉如

寄題曾高士清真齋

清濁非二理真偽同一機苟云清且真濁者斯偽而請  
看混沌初何物為端倪所以柱下公嗒焉抱希微之子  
早學仙離羣獨巖栖滔滔若江河誓不滑其泥誰為清  
真字扁乃齋之楣人皆慕渠達我則怪渠癡幻軀等臭  
腐畫錦頻推移對治自散擾分別無窮期何時一樽酒  
客至相娛嬉酒酣掉輕舟巖下浮漣漪漣漪有秋色淡

淡吹人衣顧此尚何言一笑當脫頤

哀祝明遠

我昔遊師門與子始相識襟懷霽春氣顏色澤而哲憐  
我學無方為我數開迪子言雖懇懇奈此正茅塞他時  
七月暑子與舒元易芒鞋杖而蓋訪我到林僻松陰作  
參坐快飲不餘滴清論秋夜長草舍隨所息蚊蚋及風  
露義不作賓客別來子久病傳者亦非的但云類疝瘡  
豈意至茲極我嘗習醫藥此候頗不惑中乾而外強翕

翁唇頰赭痰涎屢吞吐寒熱互煎逼我雖弗果問子固  
不能即寄書或浮沉遣价胡不克縱無續命方未必大  
差忒一朝訃音至造物爾難測老師倡絕學正賴相輔  
翼譬如萬稂莠初覩一二穡有子未為多夫子良可惜  
深慙病莫助執紼當致力及知己沒土尚擬瞻几席因  
循至如此過矣復奚飾昔為同舍好今有死生隔嗟我  
凡下資意欲填胸臆支離久成熟豈悟本方直靈苗不  
自愛日日縱螟螣今雖未照徹實信已非億緝熙苟無

急非久當有得子雖在重泉豈不念疇昔明明為子告  
執筆重悽惻

贈黎山人

有客來自江之西家傳地理姓則黎淳風郭璞今遠矣  
妙緒未絕非君誰吉凶禍福自有數竜穴沙水寧無之  
當先全我好心地待子指顧方為宜

張氏存菊堂

春華固陽艷達士蓋罕求所以朝暮間守此一斛秋白


露既泥泥涼風亦颼颼足興千古懷豈但消吾憂向來  
彭澤翁與爾何綢繆往往不得酒長吟空白頭今逢佳  
主人地位宜公侯高賓每相過輒以大白浮醉來食一  
英方寸清休休縱有俗中樂於焉非所求

慰高元博喪子

聞君生佳兒玉雪何瑳瑳每嬉書室中簡冊更懽拖舉  
臂請塗墨飛堆作鴉螺紛紛命相家許與實非阿豈唯  
必秀苗合是同穎木圓顛王瓜線早晚思一摩今年春

三月偶亦遭寒瘧遂令鸞鳳雛化作螻蟻窠青山黯無  
色白淚如流波顧此異縣居問弔空蹉跎蒙莊齊物篇  
理到不可磨嬰孺未為少髦期馬足多浮屠亦有言恩  
愛皆成魔只將彈指間一視十叔過况傳合浦上蚌老  
氣益和吐珠或徑寸紅光避蛟鼉屈信乃其常往復信  
不訛尚求樹下環暫若壁上梭秋風破新菊秋雨鳴枯  
荷且開翠醅酌以金叵羅弄琴何時聽舉案當無頗  
芝蘭敢專美弓冶非殊科徒為喪明者奈此東門何





侯菴集卷三

欽定四庫全書

集部

侯菴集卷十二

詳校官監察御史臣曹錫寶

中書臣劉源溥覆勘

總校官知縣臣楊懋珩

校對官中書臣嵇承志

謄錄監生臣劉文耀

欽定四庫全書

侯菴集卷四

元 李存 撰

古詩

題四明施華甫平軒

惟水有平德，次則莫若衡水。逢巖險地，衡付貪婪。氓隨勢作騰，注以私為重。輕試看瀾瀾，流及此釣釣。橫高象寫虛，靜列星分燦。明至公果何言，取以為吾程。雖居叔季下，是則先古生。疊疊有親睦，休休無鬪爭。奈何或不

同叔此利害兵勃然千尺起塔爾九地傾高下遂異手  
由來豈初情四明有施君少以法律名雅遊聲勢遂每  
擇夷坦行玩縱固不敢刻深良可驚宴閒開小軒花木  
羅四楹應物只如砥心神常自清勉哉幸勿墮此語非  
徒成

贈艾民章

客從西江來欲入武夷去道路既阻修冰霜况寒沍為  
求鷗鷺伴并賦鵲鷓句臨別一驅車前村但烟霧

贈孫寫真

平生懶照鏡不自見其老  
孫子偶寫之嗒馬一枯槁  
坐令百邪念勢若河堤倒  
焚香白晝靜冉冉庭前草

遊演法觀

朝讀松瀑詩暮遊靈芝巖  
道人春甕開酌之深夜談  
清竒一難逢况此二與三  
豈無黃精苗草石相與械  
明年當再來歸製一尺鏡

題雲菴

夜宿雲菴中白雲滿床頭客來雲不語客去雲不留  
明日在山下白雲何處求

題夏氏原清齋

夏氏好事者構齋曰原清苟非活水來何以為此名想  
見太古秋泠泠浸窻楹孤雲若求侶缺月相與明素琴  
既橫床濁酒亦在甕遊鱗最堪玩白鷗斯可盟心境兩  
如此是為葛天民

題柳氏雪堂

誰誇佳氣充閭宅此獨山河三尺白  
化工作巧古難逢  
合致玉堂揮翰客銅盤燒燭鑪炭紅  
衣之錦繡宜重重  
房中腹我屬阿媪房外撫汝勤而翁  
他年嗜書如嗜炙  
疊疊鄉邦起聲價分當挾策待金門  
豈忍一朝離膝下  
悅親有道構高堂龐眉皓首春雙雙  
時殺帶脂每在庾  
臘酒似乳常盈缸此心冰雪何年泮  
寒夜雖長吾則短  
黃昏衾枕有兒眠二老齣齣天地煖

湖山閣



湖邊深山一高閣閣中之人講唐虞堂千古亦人耳  
皎皎此心非我乎松風滿衣白晝靜竹月入窗清夜虛  
莫作留連光景者只將登覽送居諸

贈張伯圭孝廉

竹深十日高齋雨屢屢相過傾肺腑緣何方濶俗中疑  
為着儒冠羞仰俯婦翁開閭炎海頭提刀殺賊老不休  
帳前幕下造多士婿美如此猶林丘西山之雲南浦雨  
家次結廬心甚苦明當便上孝廉船且植松楸護千古

題趙子昂畫馬

世人相馬只相強筋翻骨跳塵沙黃誰知毛鬣風不動  
一日試之千里長吳興妙手天所借白帽奚官亦閒暇  
試令伯樂再相逢不識畫圖唯識馬

贈孫寫真

與前贈  
同時作

古今富貴者功勳在生民百世不可忘宜爾寫其真顧  
此貧賤夫誰喜復誰嗔描摸亦勞爾壁上徒凝塵

懷祝直清

烟瘴幾萬里父子唯二人視牘不尚同致辨或隕身傷  
哉苟且風奈此羞緇磷幸逢煎洗餘宜得消息新夜雨  
不可寐寒難固難晨紛紛宦遊者胡爾獨艱辛

題程氏玩竹亭

程君讀書在空谷日日開軒玩修竹山深雨過土生烟  
歌綠搖風如萬玉頗聞君家好弟兄亦有學仙遊太清  
有時攜酒歸竹下醉卧秋根吹鳳笙

義役謠

八都安仁最下都易水易旱生理無奉公往役名主首  
半是摘竊擔柴夫或因苗麥僅升斗或忝殷實元空虛  
千中得一稱上戶土赤聊當辰砂朱五更飯罷走畫卯  
水潦載道歸來晡天下末物諸瑣碎每以附近先供需  
課程茶酒率陪閉所取鹽米何錙銖逃糧逃金不待論  
職田子粒尤難輸公家督促過星火唯聽捶撻生蟲蛆  
幾年辛苦埵容蟻一界了畢鍋遊魚間逢令宰賢恤者  
蘇息無術空嗟吁省府郡帖一朝下義遜得許從鄉閭

徐君更是好義者率以公正人趨諸同時共事數君子  
但有贊協無次且出多出少由厚薄若小若大皆懼愉  
支吾縱廣非獨力伙助能幾咸安居移東走西可免者  
那上趨下歸誰歟不聞隳突到雞狗但覺和睦安犁鋤  
願依此舉更堅久美事無以三年拘

贈命士青雲仙

有客過我談星躔江湖號曰青雲仙玉堂為寫三大字  
蛟龍出海挈秋烟我今齒髮久踈豁再問行年果窮達

去年買妾始生子一笑許之非天闕且言願賦青雲篇  
焉知老退詩不傳滿堂珠玉需我語不若燒湯喫茶去

題濟川趙氏雲崖

人生安字下雲氣棲崖中賦形雖則殊適意無乃同  
繾綣衣子冉冉華髮翁列鼎足珍饌世家多古風或披  
褒貶史或弄金石桐或行溪園北或憩梅巖東涉世既  
知此尚何擾深衷矧聞佳客至未始清樽空

欽定四庫全書

卷四

侯菴集卷四

欽定四庫全書

俟菴集卷五

元 李存 撰

六言

贈別李克明遊金陵并柬閔鄧二君子

足既着幾兩履鼻更吸三斗酸風雲應有所會冰雪莫  
忘相看海內才華磊磊窗間句讀說說吾方羨子脫穎  
子必笑吾繫匏閔子東向安否鄧君北遊如何豈無秋  
風白酒奈此春江綠波詩在白鷺洲上酒尋烏衣巷中



思君幾番夜月寄我一襟秋風為已自能虛已即人須  
是下人眼底淮山冉冉帆前江水粼粼

松澗潺湲圖

吾年六十三矣擾擾茅草岡頭安得坐橫樹上只看石  
澗泉流

山泉圖

插天之山不俗出谷之泉必甘未知此景何所將欲移  
吾俟菴

贈石塘隱者

我來適自城府赤日黃塵鬢須聞說石塘深處主人浴  
罷風乎

古象山舍菜

山淒淒兮欲雨樹翁翁兮生雲喜良友兮四集慚余老  
兮無聞

湯繩武紀夢圖二首

佳遊已是夢寐清境復在畫圖人生萬事如此俗子竊

莫笑渠

其二

堦前細草雨過屋角長松風來共君說夢觀畫晚茶一  
甌快哉

侯菴集卷五

欽定四庫全書

俟菴集卷六

元 李存 撰

五言律詩

挽劉千戶母萬氏太夫人

貴作將軍母，賢知孔氏書。  
事尊聞有禮，就養喜多娛。  
遽沐原生柳，深孤潘令輿。  
想應秋月夜，騎鳳戲東湖。

挽張繼道三首

此老忽不起，淒其箬嶺雲。  
田廬今益大，詩禮昔雙聞。  
宰

木宜無憾庭蘭賸有薰碑銘千古事況得翰林文  
同邑未及識居然輓有詩天乎傾族望人或慮年饑愛  
子書連架留賓酒滿卮秋風軒外竹唯見綠依依  
池上好樓閣人今去不回荷風吹淨几竹月照殘杯親  
睦無慚色網維有達材高堂元日會拜飲幾興哀

送熊仲瑾之東川山長

葛水多材俊東川得範模雖疑官太冷所幸已非癯夜  
月青山句春風采石壺平生多古意因子不能無

送徐典史歸四明二首

細雨堂前酒初梅雪後吟誰云新識面已是舊知心  
丹蓮花幙青青桂子林簞瓢千古意臨別一何深

其二

斗邑方三載歸帆忽四明才華宜用世案牘豈勞形  
蒲水江魚出槐風壘燕輕舊游應有念還復到林垌

別朱廣文

相識雖不早相逢真偶然誰知此客妙信有主翁賢  
燈

火三餘事交游十愛篇秋風缺紅樹為我送歸船

寄易可大

別去情無奈歸來又若違炎涼非異操顯晦莫同機  
水盡魚龍遠庭荒燕雀稀花飛憐不住忍獨送春歸

次友人韻二首

蠢蠢繫羣盜胡為亂此時國恩方廣被天運更難推  
避俗思元亮知音賴子期總戎渾漢節續食况商芝

白水秋初插黃梅雨亦收賊巢渾似蟻客意豈如鷗會

飲成孤樂閒吟撥浪愁倚欄秋待月處處是南樓

再次前韻二首

擾擾兵戎際垂垂老大時英豪宜有出迂腐豈堪推  
文子徒多計龐公盍早期何由漢殿裏重產九莖芝

見說蘄州寇官軍久已收壯夫仍扼虎隱士莫盟鷗  
且共津津喜毋為咄咄愁望鄉雖有眼筋力倦登樓

元博惠名筆佳楮再次前韻以謝二首

慨爾山中客聊為脫穎時干戈雖莫與文翰必相推  
村



落終難用蓬瀛合有期可憐塵甑釜蒸煮紫靈芝  
刻玉三年楮茅堂一日收秋雲有過雁春浪可浮鷗塗  
抹吾誰許番張女自愁只宜揮翰手乘月上南樓

餞信州路敏珠爾總管

闕起陰山遠藩開信水長繫珠元落落匣劍更堂堂屬  
馬車邊集文鸞筆底翔窮閭歌潤澤豪室避光芒齋間  
儀容簡衣冠薦遇香橋成虹跨海教下錦垂檣久借空  
懷寇先徵必在黃遂令鄰邑士感激亦成章

輓倪錦江

翰苑思前輩，鄉邦失達尊。風流於此盡，墜緒向誰論。建  
學成多士，傳經裕後昆。毫端秋洒洒，語次玉溫溫。井浸  
留人轄，墻眠問字樽。一麾關塞遠，三徑菊松存。濯錦清  
江曲，尋詩老石根。蘭蓀香滿砌，槐柳綠盈門。正想名言  
立，何知大化渾。雲隨丹旆發，雪助素車屯。引緋寒宜執，  
傷肱痛更捫。佳山稱塵相，南望幾消魂。

輓軒竹亭

家得傳經士人稱用世才高情方翫竹清夢忽緣槐慷  
慨陳公轄芬芳謝氏堦昌灣高塚在愁見白雲堆

近詩五首其一美前丞相托克托公次則秦運使  
裕之次則汪司業叔致次吳博士正傳次寄潯  
州祝經歷蕃遠

丞相年方壯高情照世間堂堂先玉筍懇懇別金鑾麟  
紀垂專美雞鳴習大闢聰明既如此愚守不應難

其二

國用錢糧大于今法最嚴常征猶有橫盡瘁不宜添皇  
上真齊聖三公足具瞻喜聞秦運使奏減制西鹽

其三

見說汪司業居官極至誠孰云今世事無復古人情東  
魯民何愛吳門涕自傾幾時得相見滿意話平生

其四

樂教由先缺真為治忽機彬彬九德用疊疊八音依缺

其五

渺渺清潯水相思已再暮存心皆去魯同氣豈居夷事  
跡雖多舛襟期可勿疑情文不相稱叙語似前知

哭祝直清五首

為政心常切詳刑位尚卑瘴鄉非善攝辨口復頻移白  
鴈秋雲濶青燈夜雨疑月斜窗下夢已遣故人知

其二

比得梅州信平安喜有餘虞人雖在訟夏勝乃傳書既

領鄉親酒兼逢使者車只期青草上帆取北風初

其三

蠻獠時生變朝廷數用兵豈由皆捍鷲亦出少廉平海  
畔猶橫槩閩中始解營軒車滿道路應有痛關情

其四

力量雖難及精神似少渾享生固有數得禍豈無門人  
笑謀身拙吾嗟取義尊他鄉誰共語應是汨羅魂

其五

二昆并內氏變故亦連年事本難推度天宜少後先飲  
歡方暮景相見忽重泉何必昂山下東風屢泣然

館中呈山後諸兄弟

半月不見面經旬纔一書向來遠則已今此近成踈越  
分祇為異濡身不願餘鄉闕已如此吾計欲江湖

挽人

雜佩艱難日孤唯教育秋珍鮭宜永養仙鳳忽長遊星  
斗明雙劍松蘿護一丘晉原當不憾楚些謾多憂

次汪主簿秋日見寄

隔水秋雲薄連山夕照荒去鷗分遠色來鴈帶初涼風  
物何嘗異人生亦自忙因懷吾友問醫俗若為方

寄傅有中

風雨黃花後殷勤有報書近聞多老病今此復何如逐  
物元非得知天即自餘平生陶處士吾亦愛吾廬

餞貴溪劉縣丞

自得閑處士因知劉縣丞功名頭未白賓客眼嘗青溪



水三年似天風萬里應鄰邦兼未識無計祖長亭

送王季寶歸江西

露白村村曉霜紅葉葉飛愁邊仍歲晚客裏又人歸未  
別情無奈臨分語復遺往來王子敬莫惜寄新詩

和舒四翫月

跡有殊方阻心將翫月同山河千古外形影百年中稍  
稍高興發寥寥夜氣空不應長作客愁絕杜陵翁

郊逌汪主簿理畝歸汪以詩謝用次其韻

意得何嘗別相疏或在頻久無當道者下接屢空人郭  
暖梅花近行遲野意真却非河陽令望拜馬頭塵

次陳存翁韻

道義相知久塵埃一見難劇談真有素小市竟無觀拂  
袖君何急褰裳我未闌早知初度日寧畏酒壺寬

次張伯遠韻

虛心萬物表真意何能逃樹暗禽聲盡山明霽色牢黃  
花秋露偃紅萸夕陽高不有張伯遠清樽孰與陶

早起

短髮梳殘月輕裳試曉風無言渾似道多病欲成翁竹  
簡聊千載藜羹亦萬鍾昂昂非自異瑣瑣得無同

別黃俊昭

歸矣黃夫子清愁葉葉風深知疑我獨無補與人同天  
地年年老江河日日東相思有新語并寄鯉魚中

贈胡大使

黃河澹  
洲人

久客徒催老微名不救窮尋詩亦及我好  
事豈非公勲

業遊天北家鄉望海東  
重逢知幾日小酌晚林中

輓徐東臯

器度聞州里宗親失棟梁  
逢辰家益大好施澤宜長子  
已監公廩孫方宦帝鄉  
九京知瞑目光顯未渠央

輓邵菊存

遠矣詩書裔居然山澤臞  
探玄雖有所涉世儘多娛池  
上亭空在園中趣竟殊  
明朝原闕路楓葉雨餘蘇

贈吳景漢赴汾水縣儒學教諭

頗聞汾水縣獨在萬山中民俗宜無雜師儒易有功况  
逢賢札裔共揖釣陵風早晚錢塘便來分首肯供

送曹時中

漢相崇清淨雲仍尚爾賢高標雖未識佳句已多傳里  
下行歌薤臺邊蕩泛蓮徒令株守者目斷去帆烟

侯菴集卷六

欽定四庫全書

侯菴集卷七

元 李存 撰

五言絕句

題周伯清秋江晒網圖

晒網夕陽斜，攜壺入荻花。  
平生誤識字，恨不作漁家。

題方壺為鍾伯鏞作青山白雲圖

老硯磨不了，年年只故吾。  
羞將白髮眼，看此山雲圖。

潁川釣圖卷子為鍾伯鏞題

我耕芝山下女釣潁水上倘得吞舟鱗還能一相餉

題傅氏春山卷後

我是山中人山中滋味長一朝披畫圖又覺笋蕨香

題鍾氏筠翠軒

微風為吾曉碎月為吾夕不覺此身心蕭蕭九秋碧

題蔡敬所袁安卧雪圖

大雪深三尺高眠正自竒無端扣門者遂使世人知

題草蟲圖

西風到籬落客意方悠悠不知是何人復寫一幅秋

題龍圖

神在雲霧中形在雲霧外變德莫如龍用顯不用晦

題梅雪圖

道人心本閒亦畏六月熱赤汗不自揮開窗見梅雪

偶成

散壁晴光動侵堦樹影涼吟餘聊倚枕幽意一何長

贈夏楚材號松石



我愛松邊石松堅石不移四時同一色霜雪不能欺

懷友

美人不可見烟雨一登樓隔岸誰家竹娟娟不解愁

侯菴集卷七